

Dia 26 di November

Un fecha cu a conmove Aruba cu morto di Betico

ORANJESTAD (AAN)-Diarazon 26 di November 1986 ta un fecha cu hopi no lo lubida ya cu e dia ey a habri cu e noticia tristo cu Betico a fayece na Hulanda.

Speranza: e palabra cu a sigui biba for di momento cu un accidente a stroba Betico Croes di yega Playa pa asina asisti na e celebracionnan den cuadro di realizacion di Status Aparte.

Speranza a sigui biba mientras cu e tabata worde traslada di un hospital pa otro, y cada bez otro medico tabata trata di salba su bida.

Centro di reactivacion na Utrecht tabata e ultimo alternativa. Speranza tabata minimo.

Na momento cu el a worde traslada di Maastricht pa Utrecht, a worde bisa cu tabata tin un recuperacion leve, aunke nada espectacular a worde priminti. Realidad tabata, cu e centro di cuido y reactivacion na Utrecht tabata e ultimo alternativa y cu ya speranza pa recuperacion tabata minimo pa Betico Croes. E traslado pa Utrecht tabata serie tambe. Ya cu segun por a compronde despues cu for di momento cu el a

pasa tres luna na Jackson sin a recupera significantemente, ya por a bisa cu no tabata tin mucho base mas pa speranza.

E docter di Betico no tabata optimista. Betico tabata sufri di infeccionnan causa pa e tempo largo cu e tabata tin den coma. "Sepsis", un infeccion general dificil pa supera lo a bira e causa di su morto.

Amigo, enemigo, simpatizante y contrincante politico tabata di acuerdo: tabata tin un vacio den politica na Aruba, cu a sinti cu un gran Arubiano no tabata presente na e momentonan mas importante.

Pa su famianan e speranza cu un tata, un yiu, un ruman, lo a recupera.

Cu e speranza aki tambe su yiunan a acudi e dia mainta di 26 di November di 1986 na e centro di cuido "Albert van Koningsbruggen" na Utrecht Hulanda. Nan no tabata sa loke enfermeronan y mediconan tabata sa, esta cu ya Betico Croes a fayece.

Nunca ningun hende a haya kico ta e sentimiento nan cu a embriaga Betico Croes den e momentonan



Betico, den hopital na Miami, y e marca di e bala policial

practicamente final di su bida pasobra despues di e accidente, e lider politico Arubano no a papia mas.

El a muri inesperadamente. Ariba su cara tabata tin un sonrisa di tranquilidad: sufrimento a termina pa Betico Croes, kende durante casi diezun luna a pasa den coma, a muri ora tabata tin ainda e speranza cu un dia e lo regresa.

Su morto a conmove henter Aruba como tambe paisnan bisiña y tur corant tabata tin e noticia tristo aki ariba nan frontpage. Un noticia cu a cay manera un bom devastador especialmente na Aruba pero no menos ariba otro islanan di Antiyas, especialmente na Corsow, caminda ken cu kier por bisa kico cu nan kier pero hecho ta cu Betico Croes

tabata un politico cu grandemente a influencia e bida politica ariba nivel central di gobernacion di Antiyas.

Pasonan a sigui despues pa su traslado pa Aruba caminda el a worde dera.

E preparacionnan a worde prepara pa e siguiente Diabierna mes e morto yega Aruba y asina a sigui tramitenan tambe pa e dia di entiero cu a tuma lugar Diadomingo dia 31 di November 1986.

For di momento cu e

anuncio di fayecimiento di Sr. Betico Croes a worde duna henter Aruba a keda paraliza. Su bario di Santa Cruz por a mira mayoria di e banderanan halfstock y tur actividad a worde cancela y e cayanen tabata masha keto di trafico.

Tur oficinanan di gobierno a hisa nan banderanan halfstock pa asina denota cu Aruba tabata na duelo y tabata yora nan lider cu te awe ainda nan ta yora pe, ya manera Betico no tin dos.

